

30 Jahre Best of schnitzelbänke

1 91 8 Es Hochhuus en Riniken

Be dem Hochhuus do vis a vis vo de Gmei het mer de Hueber gseit
heiged sie be de Planig do vollgendes überleit
störmts ond schneyts hets zwenig Platz ond niemer wott nassi Socke
jo denn cha mer de wenigstens bes de Bus chonnt enand no of d`Scholtere hocke

2 99 7 En Riniker Bondesrotskandidat

Euse Melchior als Bondesrot das wären gsi de Hammer
kei Purredemo me en Bärn ond au kein Melchpriesgjammer
doch wonner de nei seit zor Kandidatur do hani so dänkt em gheime
mues de jetz wörlki so störrisch si we ame sin Esel deheime

3 07 11 En frauefröndliche Gmeindamme

Sed be eus de Obrist Ernst als Gmeindamme duet walte
hämmer emmer so höbschi Fraue wod 1. Augustrede halte
s`letscht Johr d`Irene Leueberger hür d`Christine Egerszegi
ond för s`nächshti Johr heig er scho gfrogt öb d`Frau Merkel ächt Zyt hegi

4 08 10 De gschäller esch de gschwender

Bem letschte Arztbsuch het mer min Dokter gseit ich heig no fasch kei Beschwärde
ond met mim Fettvorröt won ich heig wörd ich secher honderti wärde
was nomme honderti hani zuenem gseit potzts mech scho so gleitig
denn ben ich jo ehner onderem Bode als eusi Starchstromleitig

5 09 6 Strängi Kriterie em Riniker Gmeihus

Bis jetzt beni emmer der Meinig gsi das z`Rinike alli Affe
oder andersch gseit so Type wen ich of de Gmei chönnte go schaffe
doch sed em letschte Johr do weis ich jetzt was för strängi Kriterie die wänd
die stelle jo nor no Persone i wo en Olympiamedaille händ

6 05 12 Deför oder degäge - Komedi-Team

Also wer nach 30 Johr Schnitzelbänk de Komedi wet witer erläbe
de söll das doch bitte jetz bezüege dor Hand erhäbe
doch er wärded secher Verständniss ha wenn ich of die Abstemmig piffte
well secher weder ergendein s`Referändom werd ergriffe

Ersatzvers 06 10 Alles Fraue oder was

Dank de Doris Leuthard do esch das Johr de höchshti Bondesrot e Frau
ond met de Pascale Bruderer gelt em Nationalrot s`gliche au
ond d`Erika Forster das esch die wo em Ständerot z`Oberscht stoh
do beni froh das wenigstchens be eus no der Ernst Obrist seit wos doregoht